

2 Jon

Okoro buk nukan onoktapau

Jon ko ätäi keser jer wewon, “Is akan kamwariäim ro näwäus kiro jer kar asir näwäü kon mokoit pak jer we marom.” Karauk roat akan ronkat kesek oin, ‘Jon ko kiro jer kar asir kon mokoit pak jer we marau wa ko totok ämän mowon. Ko Kristen roasiret kar mena rai pak akan kamwariäu ro mesin pak totok ämän mowon.’

Jon nukas roasiret akan woiaka epar moin ak karauk roasiret akanun woiakas meiaun rai awarowon. Ak sät ämän areäi roat akan ämän wa rowau rai awarowon.

¹O asir, Anut nukas na nan mokoit pak nukan senes sare musowon, is, Jon, akan kamwareäim ro, okon, is ak okoro jer we marom. Isan woiakas mesin meie rau, isas karar wa, kiro roat ak epar ämän äpu, akas ran akanun woiakas meie rai. ²Owon, kiro epar ämän iken woiok uru rau, kiro orip orip iken woiok uru rawai.

³Momonek Anut, kon mokoi Jisas Krai pak awan woiawas ikenun meieanik, au epar ikenun woiakati momoi, awan ronkatis ik erar sareikoirin, keseria, iken woiok päurar rawai.

Ik erekapu jaunokot akanun woiakas meiaun onok tainorau.

⁴Karauk roat akas nan karauk mokoit epar ämän tainorin airoin roumoi, is nepipirim. Kiro onok momonok nukasar tainorwe aikowon senek keseriäi. ⁵O asir, kiro onokun, is na aisom, ik erekapu jaunokot mesin iken woiokos meiaü. Okoro sintore ämän rusapai na jer we musom kiro awau ämän wa, kiro sintore ämän meteran. ⁶Jaunokot akanun woiakas meiaun onok kesek: Ik Anut nukan sintore ämän jekur tainoriäum. Ak meter Jisas mesin woiaka epar moin opok, ak kiro kon sintore ämän keser roin, ak jaunokot akanun woiakas meiewe, ak kiro onok tainorwe.

Ik Krai nukan ämän sakau atau.

⁷Roat sosop okoro omnokou opok ämän sätäikaun arirai. Akas äiäi, “Jisas Krai ko ro senek kowau wa.” Keser äiena rai, kiro roat ak sätäiäi

roat. Ak Jisas Kraiis nukan iwäi jaukut. ⁸Ak jekur aparwe, ak kiro osap eposek owaun sarau sakau morai wa utaiei. Ak jekur aparna rai, Nāwāu nukas ak osap eposek araun sare marowon kiro erekapu arai. ⁹Utianik, kar ro ko pote kar ämän atap oianik, Kraiis nukan tamareäwon ämän jekur sakau atau wa, Anut kiro ro pak pasar rawau wa. Utianik, inok ro ko Jisas Kraiis nukan tamareäwon ämän sakau ate raiäü ro, momomok nuka kon mokoi pak au kiro ro pak pasar raiäir. ¹⁰Utianik, kar ro kiro epar ämän ak opok wa oi potonuk rai, akas kiro ro ‘pere’ rai wa aurau, akas ko akan owa wa imäi tonau. ¹¹Inok ros kiro ro ‘pere’ aurai, kiro kon jauk saremoi, kon sarau aru isanarai.

Jer pataraun ämän.

¹²Is ämän sosop rau ak awaraun itok, utianik, is kiro ämän erekapu jer wāu utom. Utianik, is ak rawa pote apwaroita, ik erek tanerai aräu, keseria, iken woiok nāwāu ererai.

¹³Akan äpinaka Anut nukas sare mowon, nukan mokoit akas na ‘pere’ aiso.